

Broj: 36/2010

Datum: 26.10.2010. godine

## ZAVRŠENA PRVA FAZA PROJEKTA “VODOVOD VIŠOČICA”

U organizaciji Saveza farmera – ovčara FBiH “PRAMENKA” i Saveza poljoprivrednih udruženja Konjic, dana 25.10..2010.godine, ozvaničen je završetak prve faze Vodovoda Višočica i njegovo puštanje u upotrebu.

Do sada je završen iskop kanala, polaganje cijevi za vodu u dužini od oko 10 kilometara i betoniranje dva pojilišta - korita za napajanje stoke, što je uz još dva pojilišta koja će se naknadno uraditi, ptrojekat vodovoda Višočica.



Projekat dovođenja vode na ovaj dio Višočice bio je aktuelan i prije deset godina, kada se zbog različitog pristupa u realizaciji od istog odustalo, a ideja ponovo pokrenula polovinom 2010 godine.

Ponovnu realizaciju projekta pokrenuli su Savez farmera – ovčara FBiH “Pramenka” i Savez poljoprivrednih udruženja Konjic, sa vlasnicima stoke s ovog područja, a podršku za njegovu realizaciju, dobili su od Federalnog ministarstva poljoprivrede, vodoprivrede i šumarstva i općine Konjic.

Jaka kiša, vjetar i magla nisu omogućili da se uživa u ljepotama Višočice, ali nisu spriječili da zvaničnom završetku prve faze vodovoda Višočica, prisustvuju: načelnik općine Konjic, gospodin Emir Bubalo sa saradnicima, predsjednik Općinskog vijeća Konjic gospodin Ivica Ružić sa vijećnicima - predsjednicima klubova, predstavnici Federalnog ministarstva poljoprivrede, vodoprivrede i šumarstva na čelu sa savjetnikom ministra prof.dr. Vjekoslavom Selakom, predstavnici Savez Farmera - ovčara FBiH “Pramenka” iz Konjica i Travnika, članovi Upravnog odbor i Stručna služba Saveza Poljoprivrednih

udruženja Konjic, predstavnici Mjesne zajednice Glavatičevo, predstavnici Izvođača radova i farmera.



Ovo područje Visočice do sada nije imalo vodu za piće niti za napajanje stoke, što ovom projektu daje veličinu i što farmerima omogućava da svoje poslove rade sa velikim olakšanjem. Do sada su po nekoliko sati u jednom pravcu gonili stoku do vode, a četiri pojilišta ravnomjerno raspoređena po Visočici im taj problem rješava.

Uz riješeno pitanje napajanja stoke ovim se kvalitetno rješava i pitanje pitke vode za mještane, kao i pitanje stvaranja boljih higijenskih uslova za proizvodnju sira i ostalih proizvoda od mlijeka, a posebno pomaže realizaciji projekta proizvodnje sira iz mijeha, koji se počinje proizvoditi na ovim prostorima.

Realizacija ukupnog projekta i uslovi koje stvara, podrazumijeva veći broj farmera i brojnija stada.



Zbog kiše posjetioci Visočice su u zatvorenom nastavili analizu ovog, kao i narednih projekata, koji će poboljšati uslove rada poljoprivrednim proizvođačima i omogućiti bolju i veću proizvodnju, a koje će podržati Federalno ministarstvo poljoprivrede, vodoprivrede i šumarstva i općina Konjic.



Pošto je ocijenjeno da je projekat “Vodovod Visočica” veoma bitan i za farmere koristan, dogovoren je nastavak – druga faza projekta, kojim bi se vodom obezbijedili i ostali prostori na Visočici. Nastavak projekta zahtijeva iskop dodatnih oko 8 kilometara kanala, nabavka i polaganje cijevi za vodu i nova pojilišta.

Općina Konjic je saglasna da se projekat nastavi i isti će finansijski podržati, uz nadu da će to učiniti i Federalno ministarstvo poljoprivrede, vodoprivrede i šumarstva.



Na kraju ovog druženja predsjednik Saveza farmera – ovčara FBiH “Pramenka” i Saveza poljoprivrednih udruženja Konjic, gospodin Nusret Avdibegović se zahvalio prof. dr. Vjekoslavu Selaku, za nesebičnu podršku projektima koje je vodio Saveza farmera – ovčara FBiH “Pramenka” i Savez poljoprivrednih udruženja Konjic, zadnjih nekoliko godina, a kao znak zahvalnosti uručio mu je i skroman poklon.

SAVEZ/ZAJEDNICA FARMERA – OVČARA FBiH „PRAMENKA“  
ID broj: 4227662440000 ŽR 1604600047233364